

四庫全書

集部

欽定四庫全書

集部
西村集卷二

詳校官監察御史_臣曾坦

中書_臣劉源溥覆勘

覆校官中書_臣康儀鈞

校對官學正_臣常循

謄錄監生_臣劉家瑛

欽定四庫全書

西村集卷二

明 史鑑 撰

五言古

芙蓉

皎皎芙蓉花盈盈出秋水美人蕩舟來容顏宛相似采
之欲為衣離居有君子路遠莫致之引領徒為爾但恐
秋風生零落從此始

夜宿吳原博修竹書館時與王汝別

歲暮入城郭攬衣獨裴徊

叶

晚過修竹園主人故所知

所知誼不薄執手言相思復有青雲士遠行從此辭相

延入中林呼童啟雙扉

叶

北風何烈烈萬籟鳴參差向

夕燭繼之壺觴相為持初月出雲間殘雪擁寒堦

叶獨

鶴失其雌中夜鳴聲悲會面不可常況逢生別離共言

盡今夕鷄鳴各東西

叶

出處自有時人生安得偕

叶顧

慙鷄與鷄不隨黃鵠飛

叶

各各重自愛冀以奉前規

懷古貽朱堯民

晉氏昔奔潰

叶

中原亂如沸區區廣陵相亦欲盜江介

叶不有顧元公

名

禍亂斯其殆

去聲

旣成揮扇功終定繼

牛位盛德百世祀胡為忽云廢古墓逼耕犁荒祠雜妖

厲過者豈無人誰能一留睇遙遙千載間哀哉日陵替

陵替信有由好古無其人請看王侯墓十樹九無存

叶

謝公

名應芳字子蘭毘陵人

避地士栖栖不遑寧

叶

時無戡亂才

干戈日相尋

叶

九原今不作盡然傷我心

叶

上書告縣

令

周舜臣

祭掃除淫昏

叶

碣石永其傳

周伯溫撰

栽梧表其名

叶同時文章家頌咏費數陳廢興如循環旋復委荆榛
荆榛易永久百歲等須臾守令檢文法長年惟簿書一
為高世談舉俗笑其迂纍纍道路邊誰復責斯墟朱君
志好古覩此興長吁輯錄匪求名庶幾能者須遺祠幸
見復廢墓未應蕪雖非令式載允為名教圖君其加勉
旃慎毋忘厥初

讀楊君謙古樂府

去古日已遠雅樂久沉淪桑間與濮上靡靡多哀淫叶

楊君媚學子高志故不羣叶一聞世俗音謂非吾所湛

叶冥心太古初識樂得其真律呂既調協五音和且平

叶咸英與韶夔曠世今再聞叶豈惟以自娛擬將獻吾

君奏之郊廟上庶以和神人

謨無猷邀飲於南虛室讀壁間馮明府詩有感

獨客困泥雨閉門愁索居天晴氣微和欲出嗟無興隣

僧念孤寂招邀過精廬緒風泛林條溜水鳴階渠良友

四五人壺觴聊爾娛陶情匪絲竹冥心遊古初為樂苦

不常奈此年歲徂一適非偶然且復少躊躇興懷舊遊
者由來心迹俱風波一分散判然區域殊精神莫與通
夢寐時交胥願言此浮雲隨風往微軀

韜光庵

韜光古精舍遠迹西山岑岡岫屢回複雲嵐杳深沉流
泉激修竹綠蘿被青林密葉翳朝陽芳柯承夕陰杖策
遵微徑逝將支遁尋行行未易即遙聞鐘磬音徙倚絕
塵想冥思諧道心褰芳咏招隱松風和悲吟

臨清軒為吳士延賦

達人尚幽勝葺宇臨清流
清流宜濯纓深渚可容舟
周流元不息晝夜恒滔滔
叶微風蕩生瀾木葉下驚秋
流響歸空房浮光映高樓
芙蓉緣極浦杜若被芳洲
於焉事栖息駕言聊出遊
榜舟張水嬉擁楫和長謠
叶屏然窮怪物蓮折傾龜巢
叶鳴更出靈鼉騰予躍文魚
叶境勝良自愜慮淡信無求
惟應素心人來此共逍遙
叶

贈沈啟南

椅梧生南岳枝葉交相加叶孤生不自異衆木何其多
鳳凰翔中天時來息其柯中郎久不作奈此良材何誰
能為琴瑟奏曲諧雲和遂令清廟器寂寞捐山阿

贈汝其通

江南有淑女婉孌美清揚芳馨振微風容華耀朝陽被
服鮮且麗不殊古姬姜蹇修來何遲幽獨處蘭房匪無
室家願夙以禮自防一朝君子求玉帛以時將御車迎
百兩道路宛生光和鳴合琴瑟宴衍吹笙簧顧茲待年

者後處亮無忘

寄許克大

春風布寥廓萬卉咸華滋灼灼滿中園婉綠還抽緋笑
蓉抱幽獨兀兀空江湄誰云發生晚無乃未逢時一朝
秋節至盈盈花滿枝回看艷陽質孰與孤高姿時來即
成就晚達奚足悲

丙午初度題像

時年五
十三

自我得爾來忽忽已三載憂樂不相關貧病安能免茲

晨遇初度舉酒一相灑我貌日就衰爾顏常不改過此
復幾時應知愈不逮觀者問為誰曰我咸疑紹惟餘舊
親識追想為爾拜茫茫天地間歲月不相待終當委運
去誰亡復誰在謂是無所知言非亦何解一笑兩茫然
浮萍渺滄海

送梅刑部彥常

臨江理舟楫駕言辭故鄉故鄉非不安憂君未能忘握
手一長嘆出門何慨慷所遇無險夷行行盡周行老驥

志千里遊子懷四方豈知轅下駒局促徒悲鳴叶聖朝
雖致治庶事未盡康江南多苦雨江北多愆陽遺民日
啼飢已空糟與糠救荒豈無政何能補流亡秋高塞馬
肥徵師守邊疆行者犯鋒鏑居者共餓糧遣使出監護
寇盜恒相望未聞奏捷功聲勢徒張皇君昔在郎署明
刑凜秋霜仁聲久洋溢遠追于與張茲行定高擢指日
登巖廊願弘濟時具拯斯昏墊民叶莫以合燭故愛此
東壁光丈夫得行道離別何足傷

過梅花道人墓

元吳仲圭
嘉善人

問津武塘下攬衣獨吟行徘徊古道旁
纍然見孤塋荆榛竄狐兔牧豎時來登
橡樹半無枝曲池猶未平哀哉梅花菴
一仆不復興空遺水墨踪允為後世程
高風董巨間不得名丹青古碑亡文章
但銘卒與生生前狗名教豈樂浮屠名
將非有深識季世多兵爭愚人信因果
庶幾保其形同時富豪家厚葬侔山陵
毀盜殆無餘遺骸縱復橫珠柙去已久
蔓草來相縈何如一抔下晏然

無震驚取重亮在人信非山水靈采芳薦清醕日落風
悲鳴遙遙望遐躅感歎有餘情

遊寶石山有懷舊遊劉廷美沈啟南繼南兼東

徐時用仲彥輝諸立夫

山靈謝逋客陰雲故瀾漫叶淫雨日潺潺朝來稍停倦

出門望西湖如見故人面眷茲寶石峯樓臺憶曾館叶

老僧擁破衲松下一笑粲叶興懷舊遊者零落已將半

叶淒然不成歡臨風發長嘆叶主人遠追隨况乃集文

彥共言春將歸與子同飲餞徒倚被層闌逍遙寄華燕
暢心風振衣屬耳泉鳴澗無端霧雨霏須臾益零亂叶
初疑水氣浮復訝山林暗叶佳景能娛人過眼無留盼
一適乃云可得喪非所患叶嗟彼牛山遊胡為淚如霰

南山道中

約劉邦彥諸立
夫虎跑相會

我行南山中忽忽日將午連岡兀如城盤回抱林隴嵐
氣鬱以深原田何膺膺長松挺人立怪石驚獸怒道旁
何青青幽蘭間芳杜古洞閤烟霞流泉瀉風雨緬懷如

玉人先期在幽阻停車望白雲光儀渺何許

送節推華公謫官

張飲春江湄送此倦遊客冠蓋何營營臨行紛贈策吳
人感恩深攀路隨充斥行藏固由命但為公論惜梗枿
棄中野蘭蓀槁深澤良時難再遇杳然山海隔黃鳥嚶
其鳴青驪逝安適浮雲忽歸山霖雨不成滴湛湛長江
水粲粲水中石風波汨其泥所遇非故迹惟其有本性
居然自清白勿以窮自卑徽音慰離析

頃以多故絕不作詩春暮霖潦為灾穀未入土

恐有過時之憂聊命紙筆以諗同志云

生生本陽德萬物咸華滋窮陰忽為咎積雨無晴時顛
風泛洪濤蕩決渰畚耨溝壑有遺民憔悴半流離空林
少烟火晨膳夕無炊縣官急租稅督責煩鞭笞但知赴
期會誰能恤寒飢日月更相送春事奄無遺過時而不
耕秋成安可期雖有勸農令文具亦何為傳聞盜賊起
民窮多致斯咄喑有深憂豈惟漆室葵

賀其榮病京師吳原博昇歸第中而卒為之殮

殮其榮父作感義詩謝之要予同賦

翩翩宦遊子抱疾居京師俗習有由來病者栖簷垂一

命亮莫延辱哉斯兩兒

時携子姪同往

夫君數往視念彼形神

離舁歸以待盡後事經營之封書告其家殮服飾其尸

塗殮就客位受弔居東階

叶

且為錄行橐以俟歸葬期

死者如反生不媿臨訣辭朋友居五倫幾人能弗虧勢利相驅合禍哀隨背馳况乎死生際避遠固其宜有能

聞斯舉其顙泚乎而題詩頌高誼且以箴吾儕

叶

鍾希哲者台州人也妙於傳神成化二十年春

沈君啟南偕余訪之欣然命筆咸云甚似因

賦詩記之是歲四月十二日余初度也書於

豫章堂

人生無百年五十又過一去者日以多來者日以徧情
慾與寒暑晝夜相剽賊徒行已須杖短髮不任櫛顧茲
孱弱軀那為久存物一朝隨化盡形容不復識鍾生妙

傳寫為我聊把筆傅染藉丹青經營自胸臆精神與形
似毫髮無所失端如鏡中影恍若水底石大均斯賦形
其理固莫測孰知毫采功妙奪造化力我聞先正言自
治不外飾求真既為妄望久寧非惑君看古人像存者
百無十惟能慎厥修廢幾為永則

遊飛來峯

久圖山澤遊苦為風雨歎驚雷破重陰及晨光已顯透
迤入幽深厲揭度清淺靈山傳飛來合澗互回轉蘿垂

手可捫松高蓋惟偃陽厓丹霞凝陰洞蒼雪滿秀色如
可攬絕巘竟誰棧衆竅因風號羣芳遲春衍追念平生
歡歷歷猶在眼匪無新相知已少舊遊伴老僧久見招
相攜集閒館解衣任盤礴覽物適蕭散形忘慮則消情
至心莫展寄言同懷人對酒歌勿緩

夜宿虎跑蘭若

我昔遊虎跑旋歸一何蚤奄忽逾十年尋常掛懷抱題
詩寄尊宿平生緣未了

予前歲曾寄詩僧敬祖規有翠
濤軒上重遊約此是平生未了

緣之句

茲遊非偶然歷境極深窈山靈喜客至隨方故呈
巧鐘梵鳴雲間樓臺出林杪涓涓石中泉天遺潤枯槁
淪茗味更佳煩勞頓如掃載咏坡仙詩條然出塵表夕
陽下高樹暝色栖芳草攜被卧重巖山空寂以悄神清
不能寐轉輾達昏曉晨光忽熹微啁晰聞啼鳥攬衣出
烟蘿從人問周道

落景村

為沈啟南賦

羲和駕驟驥杳杳經天衢向夕迫崦嵫弭節少躊躇餘

光爛未收冉冉下桑榆歸雲栖遠岫暝烟生廢墟野雉
雖中林牛羊下城隅回風忽復來灌木吹笙竽野老耦
耕倦盟濯歸茅廬曳杖數雞豚引水灌畦蔬達人尚真
意寫圖聊自娛天機宛流動匪為形似拘

一木

為李思
式賦

木以棄而壽人以晦自全君看櫟與樗蔽牛非偶然乃
知為世用孰若全天年覽物有深感悠悠復何言

題劉大參

名欽
謨

所藏蘭圖

圖上逐段摘
書離騷句

秋蘭何青青羅生湘水旁芳馨隨風發菲菲久彌章嗟
哉好修士采蘋紉為纓人多貴蕭艾謂斯為不芳草木
猶未得理美奚能當若人寫毫素鑒之宜不忘靈修苟
見察萎絕亦何傷毋為翫形似無實徒空長浩歌離騷
經余襟涕浪浪

余自病目閒居寡歡丁未歲初度試展余真命
酒相對嗟歲月之不留悼面目之非舊因戲
為問答以自釋焉

形體本天賦全生無少缺去冬嬰禍惟一肯肆微孽藥
石豈不良終焉左其昧譬彼陽光微有星俄爾字子雖
我寓形自來相附結如何視得喪曾不致悲說將非坐
斯累乃與子乖別忽然如無情默爾斯結舌子應徇世
情盛衰因改節有情與無情畢竟同歸滅慷慨奏清謠

輕雲蔽明月

問真

我生非孕育因君試經營形神日相向如影長隨身君
惟昧調燮氣淫斯疾臻胡為不自省乃獨尤我云我不

與君厚舉世誰復親改節或他人匪為我與君我雖具
形似生而無性情休戚殊不知是非安得言病目固為
患未足傷君生勵志苟不衰存賢沒稱神廢視傳春秋
聖門名素臣視日能不瞬亡宋實斯人乃知善與惡豈
由盲不盲君其務自勗我亦同令名

真答

送劉德美之京

風吹大河水晝夜無停流嗟君萬里行且復須臾留王
命自有程安能顧朋儔執手兩茫茫日暮登行舟皇家

重賢才一藝咸見收况茲衛生功妙與元化侔譬彼照
乘珠所往無不售叶願言進明德流光被中州

神樂觀送沈啟南

暮春和氣暢冠紳集城隅振策闢奇蹤流目盼靈區圜
邱鬱中天皇矣神明居飛宇入浮雲光景曄朝霞叶交
龍麗瑤砌摯獸緣金鋪川梁駕流虹靈泉激深渠嘉樹
夾道生芳柯綴丹敷奏風何泠然鈞天張清都娛戲易
永日列筵湛清醑宣和賴聲樂間以嘯且歌叶彼美邱

園客逝將賦歸歟羈縈怨遲暮臨風發長吁

十八日登含虛閣

圓景光漸闕海溢秋生潮禪林敞高閣勢欲凌雲霄老
僧敬遠客良夜相招要焚香足清供舉酒聊逍遙河漢
西南流微風忽刁調夜氣悄且清川原何寂寥悠然動
遐想凭闌發長謠商聲出金石餘音一何嘹願隨瑤臺
鶴高舉乘飄颻

遊金粟寺

在澱浦
西北

我行爲尋山言至東海隅連峯盡成童黃茆彌所如於
焉載瞻矚盎然風氣殊杖策試探討聿來金粟居山形
既環合土壤還膏腴澗水絃鳴琴松風簧亂竽蒼龍與
青鳳聯翩戲庭除好鳥鳴高枝嚶嚶如有須老僧聞足
音延客入精廬名香手自焚茗供與之俱言論即契合
不異相煦濡向夕猶未歸欲別更踟躕茲遊幸一適如
此良非虛浩歌下山去人生電影如

贈支硎山人

幽人戀墳墓構此山澤居層巒代屏障積石當階除飛
泉漱瓊瑤靈籟鳴笙竽清音度回風頽響栖芳株入耳
盡成曲喈喈良不殊臨軒睇冥鴻坐石見游魚飛潛各
有適悠然忘所如緬懷放鶴人不得同交娛商歌滿天
地如與金石俱富貴非吾欲逍遙真有餘

送周元基之京

孟冬寒氣肅鴻雁飛南翔嗟我同心人翩翩翻北行
朔風捲征旆轅馬忽悲鳴叶僕夫在門前親賓張道旁

心知生別離取醉暫相忘君昔負奇志少年懷四方迫
促未得施所業但文章茲行騁良圖騏驥超康莊行道
在濟時豈惟名譽揚野人幸東壁冀願承餘光

謝吳鐵峯法酒糟魚

秋水滿陂澤高榆蔭村墟閉戶動經旬未能忘索居足
音何茫然忽枉故人書欸曲念睽違况有庭實俱法醢
出上尊海魚離糟邱叶香味良夢然夔與常調殊懷惠
欲報之顧無瓊與琚惟於引觴際頗覺愁思祛分甘餉

吾兒俾知君意劬努力苟能珮兔為人所尤

叶

經玉遮山

夜宿光福里晨行玉遮山玉遮何深秀岡岫相回環古
來賢達人纍纍塚其間碑文半磨滅松栢多摧攀子孫
不復來存亡非所關感此成獨立臨風涕潺湲

登鳳岡

瞻茲鄧尉山盡日窮吟行叶晚登鳳岡頂四顧何蒼蒼
羣山如列城峯嶺互低昂杳杳西日下澄湖浮練光野

鳥相和鳴涼風吹我裳梵宇襟民居樓閣鬱相望聞有
賞心人疇昔此徜徉况當梅花時玉雪被連岡題詩動
幽興寫畫存遊蹤叶去後訂重來中為事所更叶乃知
百年內為樂安能常興懷發孤咏浮雲共悠揚

聽鶴

明月出滄海流光照中庭翩翩青田姿深夜時長鳴一
聲聞於天露白涼風生鏗鏘激金奏悠揚協鸞笙達人
厭絲竹隱几冥心聽高低盡成律入耳通心靈沉吟不

知味恍若聞韶頀但恐衆仙至驅之遊太清

送郭訓導

仲秋百卉腓旅雁思南翮涼風吹客衣嗟君事行役三
調不徙官依然在儒籍皇朝重文教此任故精擇諸生
得造就疑義資剖析入室與升堂煌煌盡圭璧冷熱固
人情於君自無斃浩歌菁莪篇芳塵滿瑤席

送魯舉人廷瞻廷對

秋風動地起原野忽蕭條之子遠行遊心旌自搖搖中

夜視明星鳴雞正嘒嘒晨興戒徒御四牡一何驕傾城
此送別張席俯西郊杳杳即長路依依謝故交故交從
此別執手未能發向夕起重雲白日光明滅維茲大廷
對盡言斯效節效節自吾分過此非所缺不聞劉去華
沒世名愈烈努力景前修徽音慰薄劣

訪沈啟南中道相遇既示斐章且形繪事賦答
病起言出遊行行入吳苑懷我同心人去此苦不遠安
能待折麻始為情可展榜舟汴川流疾進猶言緩天寒

鴻雁哀水落灣碕淺顧望念何深獨行畏日晚日晚將
何之風悲雨淒淒君子枉前途引領見容儀精神亮相
契遇此如有期何必造門屏然後盡中懷叶君行當入
城余亦從此歸方舟且容與未忍言別離別離悵悠悠
於焉聊寫憂暝投蘭若中宴衍叙綢繆起坐臨前除彈
琴和清謠叶重陰翳明月寒風振山邱慷慨令心悲欲
罷不能休沉吟出門去雞鳴忽嘒嘒叶

蓬壺道人

登高望瀛海弱水何茫茫巨鰲戴三山屹立水中央金
銀為宮闕玉樹森成行微風振其柯泠然奏琳琅中有
遺世士餐霞仍嗽陽飛龍為我駕瓊糜為我糧容顏若
嬰孩不老凋三光悲哉世間人年命如朝霜

遺橘吳鐵峯

中園有佳橘結實何累累經霜不盡采時為窮歲資念
此難獨有一朝遺所思所思亮不乏聊用致我懷

雲巖書屋

幽人厭城市言就雲嵒居嵒居杳且深所藏惟簡書五
車未為富萬卷良有餘白雲出巖間俄來集窻虛風吹
去復來似為君子娛於焉日容與庶幾名實俱

挽吳安晚

即鐵峯

徂謝易永久奄忽移陰陽泣卜告門東日月得其良祖
載出中庭送子歸山崗愁雲結重陰白日黯無光前旌
御廣柳丹旒隨風翔徒御皆涕零素驥亦悲鳴叶行行
適幽宅稅駕斯馬藏明器雜前陳苞管瘞柩旁顧視但

漫漫長夜永無明叶骨月行當化魂氣杳飛揚慟哭不
復聞祭奠安能嘗送者各自歸誰為少徬徨狐兔如有
情時來戲玄堂千秋萬古後猶悲思故鄉

慈節吟

薄命嬰禍罹良人忽摧夭哀哉襁中兒呱呱泣昏曉殉
死非所難奈此孤而藐宗祊與族姓所繫良不小忍死
少須臾辛勤撫而保盛年謝膏澤潛身處深窈近市媿
軻親延賓慕陶媪兒成奉祠祀春秋薦蘋藻身為朱氏

婦庶幾以終老榮名靡所圖節義乃常道

讀釣臺集

子陵遜世士因亂在齊邦羊裘物色中三徵往帝鄉傲
睨帝王尊唾視名利場辭榮良足欽適用非所長觀其
卧床對豈不由衷腸願從巢父流接跡潁水陽詔許放
還山於馬漁且耕君臣義交盡故舊情靡忘希文守茲
郡披榛弔顏荒節詞薦蘋藻伐石銘文章節禮兩言立
日月可爭光如規莫加圓如矩莫加方後賢務新奇論

議太低昂遂令禮賢舉造化聚訟端叶唯陵固漢人清
節起東京叶况之三代士斯言殊未當逝者如有聞應
亦以為平叶遙遙望雲山永言多慨慷

秋日禱興和程學士克勤韻

瀼瀼澗下水蕭蕭竹間風愛此幽且深葺宇當其中既
無紛囂雜且有靜省功吾道在方策雋永將無窮至理
苟冥會萬象咸昭融悠然起遐思忘彼南山崇

其二

率溪有精舍是為咸買居所惡乃聲利所好在詩書閑
關謝往來長年味道腴衣食常不給舉世笑為愚孰知
南山翁懷此久跼蹐魚鳥雖可樂獨行無與俱惟應浴
沂者庶幾為我娛

答沈彥祥賀生孫作

生兒免無後未別為賢愚日夜望成人粗令業詩書兒
今復有子頭角宛相如得孫固云喜無乃添吾憂叶痴
兒不好學枵然腹空虛未知為人子徒令尊自居故人

繆相愛遺我瓊琚詞叶
上言由先德下言攜掌珠何時
得良晤看此庭中趨

贈王文冕

少懷四方志乘時遠遊嬉
西經宜興市落魄無人知
夫君何自喜枉駕與之歸
華燈坐良夜高論露中懷
古今無窮變疊疊解人頤
雷驚蟄斯啟鐘鳴霜乃飛
相知苦不久旋復成乖離
出門即長路驅車獨栖栖
浮雲蔽闕山洪流帶邦畿
可望不可親悠悠勞我思
秋蘭抱幽香

寒松挺孤枝芳華信能保應無遲暮悲

再疊圖塋致思四首

遙遙天馬山羣行出城外

叶

澗水東南流禾黍資灌溉

叶地幽抱神界穴秘聚生氣繡衣念厥祖營為卜遷計

謂彼穀城藏於中猶有悔茲馬事改作辛勤閱年歲種樹皆十圍畚土非一簣魂氣無不之體魄永攸利夏官

如有知含笑於下地載誦思亭章令人發深嘅

叶

寶澗西原

茫茫天地間壽者何其少哀哉象峯麓孤墳埋百草下

有潛寐人長夜無時曉當其蓋棺日孤兒未離襦抱道
竟不施策名空太蚤郡守解憐才於馬卜其兆穿中既
深銅營旁亦高燥兒今立要津英名流四表褒封賁泉
壤奎章挾天藻夫君身後名有如白日皦

象峯
東麓

莆中地濱海羣山多象形眷茲鳳凰山名之斯稱情盤
迴若飛舞峙止疑栖停五隴相起伏形勝由天成林侯
卜其吉為母開佳城樹檟匪求材礲石斯為銘五患既
盡除一杯期永寧雨濡與霜降春履仍秋行感此狐兔

迹況聞風木聲淒然淚承睫寒泉亦悲鳴

鳳山
北隴

死生晝夜理在人皆善言及乎處其際變色不能前
徬徨顧妻子事事成悲憐請看塗嶺穴中有長生天上書
論國憂志欲除其姦天人與順逆大義何昭然玉工昧
其理反為和氏愆營茲以待終將歸要領全聖皇重直
諫再命居臺端直氣不可回風節故桓桓容悅亮非歡
忠義素所安豈如莊列輩响响談神仙

塗嶺
南窩

介子永齡邁厲頻死味芝陳先生實生之用求

姻家沈君啟南寫圖復系之以詩聊報萬一

云

愛子本天性少者亦何深念茲成童年苦為瘡所侵寒
熱日交戰孱弱詎能禁人云鬼之為母乃陰陽淫先生
希聖流用推仁者心一投去其苦再服保其真寢食如
平時竒功妙入神老南寫斯圖為是平生親種杏固寓
言況此及物仁圖亦有時既言亦有時泯叶惟應受賜
者身存恩亦存叶

舒嘯亭為東林山陳氏賦

淵明一代士所懷在本朝棄官歸去來舒嘯登東臯將
為憤懣深豈以音節超亦有逸羣人葺宇此逍遙發口
忽成音逸響一何嘹長風集萬里游雲薄九霄幽深比
琴瑟清激超竽簫綿駒喪其精王豹亡其謠眷茲自然
妙何須鍾律調遙遙蘇門山至人當見招

三天竺

浮屠善幻化利益誇羣愚未能空諸有亦復崇其居巍

魏金銀宮湧出空山隅興廢固由人無乃法所驅眷茲
天竺名古來封域殊移之被此地欲表神靈區地勢既
形勝人情亦奔趨我來適閒曠二三同志俱登頻雖云
勞逍遙還足娛仰睇羣峯秀俯循流水迂微風動靈籟
滿耳聆笙竽徘徊將日暮浩然賦歸與

一愚為沈廷望賦

人以智自銜子以愚自矜愚智盡天賦有無何重輕紛
紛效愚者卒獲詐以名外飾中或殊居然汨其真子能

慎自踐斯名方稱情俞也不可及回也言如之險艱致其力退省發其私愚於此何有聖言當不欺

折楊柳送張子靜歸吳興

下馬折楊柳春淺條未長東風吹落日行人歸故鄉朝發閭門道暮宿碧瀾堂仰看天上月千里共流光

贈李中翰貞伯

層城多甲第朱門赫嵒嵒曲水起飛橋樓觀相陂陀何人拊瑤琴獨坐當中阿朱絃激清商慷慨和悲歌回風

振叢薄游魚躍靈波大雅久不聞舉世尚淫哇知音既
云少笑者亦已多沉吟下階陞感嘆將如何

贈陳玉汝

少婦婉清揚當戶織玄黃朝朝弄機杼曄曄成文章筐
篚遠貢之裁為君衣裳衣裳近玉體衣被自生光苟非
尺寸益焉能置君旁

有懷沈啟南吳廷暉二姻家

日落照高樹枝葉何輪囷上有嚶嚶鳥鳴聲如索羣與

君別離久邈若參與辰結交非不多何如兒女親河水
盡日流浮雲盡日行行雲與流水不及思君情

賦秦伯祠送李舍人

行行閭門道清廟臨通津借問此何居至德垂鴻名

叶

疇茲商周際天命固難諶

叶

避狄始寧居翦商志將萌

叶聖孫天所啟周道方日新夫君見其微遠竄來蠻荆

叶冠冕化文身禮義開吳民讓國非求名此意難具陳

顧惟君臣誼况乃父子親向無宣尼言誰能識其心

叶

李膺吳中彥懷古意何深叶行當侍帷幄揚芳播清塵

七言古

題沈啟南畫月下杏花

我昔慶雲看杏花春雲壓樹埋晴霞無端風雨中夜作
狼藉滿地同泥沙十年蹭蹬不復見無乃天意於吾賒
老南忽往花正好兩株繁華對晴昊白日苦短看不足
更向良宵事幽討月明照花花在地恍若清波漾文藻
夜深露下花更佳汗濕蛾眉淡於掃巫山神女朝夢雲

洛水靈妃夜當道知君好事不可當
遶樹行吟被花惱
詩成得意難具陳
片紙再與花傳神
品高意遠迹逾妙
反覺樹上花非真
須臾喧傳動城郭
借看累月紛蹄輪
君不見虎頭曾圖瓦
棺壁觀此雜沓輸
其珍老僧老僧
收拾去且莫出示
無錢人

紫陽庵

玉光薰天天帝怒
勅遣天丁劈雷斧
電掃霆驅葬海中
散落南山把山補
龍血淋漓凝紫瑤
玉枝瑤草交瑩英

桂影蘭香泣秋色仙妾坐花吹玉笙千年老鶴噤不語

蕭颯蛾眉怨神姬

有丁野宦遺蛻其妻亦出家於此

東望蓬萊一水間

黃塵霏霏正如雨

梅月

老兔爬天團玉生山河影動參星橫羿妻潛奔姑射笑
霜氣作華凝珮纓瘦影寒香塞天地茅店村醪冷無味
翠禽忽聽啼一聲凍雲零落東方明

秋江客思

洞庭嫋嫋涼風起木葉驚飛下江水江水悠悠烟景微
江頭有客未成歸身經北渚雲山杳家住南京音信稀
乍見霜前飛塞雁還聞月下搥寒衣寒衣作就家家寄
可是儂家遠難致男兒出門不返顧直欲浪遊天盡地
輕舟短棹恣經過水遠山長風浪多花艷驚郎大隄女
聲諧流徵郢城歌歌聲入雲花滿堂夜夜朝朝樂未央
勸君莫上瞿塘去兩岸猿啼能斷腸

送樊司理考滿

東方日出城門開雨灑道路無塵埃傾城出送使君去
前車後車相逐來路旁弱柳不堪折祇把新詩贈離別
使君巖巖廊廟姿三尺由來能自持平反不待慈母問
考課行對尚書期最君治行當第一一蹴登臺不為疾
君不見漢朝任人尚法律獄吏往往為公卿釋之世謂
冤民少定國人稱用法平況君明經取高第比擬不能
無重輕更將古義決疑獄莫謂明時無董生

澄上人房紫牡丹開觴予以酒因詩以記

入春風雨長交作水波遶舍如湖灩桃李沾泥海棠謝
負却人家看花約追呼聞欲檢民數愁疾強扶來縣郭
市中湫隘不可居却向禪林借高閣忽驚妖艷破寂寞
況乃駢花與重萼芳心暈露金粟數嬌態迎風紫綃薄
初疑僧伽演妙義天女來聽髮瓔珞又如洞庭張廣樂
仙姝聯翩揚戍削傳聞此種出羅山未必分根盡河洛
姚家荒蕪魏家廢總有華容亦非昨品題何須較優劣
但得相娛不為惡老夫睹此喜欲狂遶花吟行不停脚

只愁兩日損顏色好事誰能致油幕又無仙家漆姑汁
可使濃華不凋落老僧破戒為儂喜斗酒沽來對花酌
掃除熱惱得清涼攪就醍醐出酥酪人生真賞貴適意
不在歌鐘始云樂夜深秉燭更相照春城月暗鳴宵柝

送浦汝方訪姚侍御

君家寫山樓上住

浦樓名

掃盡雲山入毫素扁舟六月沂

吳江欲向丹邱最深處丹邱主者繡衣人年來畫筆如
有神遠慕荆關探妙訣旁尋吳盛接芳隣與君舊日相

知久握手無言驚白首怒呼銀鹿掃庭花笑倩瓊姬獻
杯酒酒酣鬪畫為歡娛峯巒歛來當座隅摩挲老眼識
真趣脫帽席地驚相呼我欲從君往盤礴無奈塵紛苦
纏縛臨江送君君不留離情直與江東流

送康驛丞之京

皇天不雨江欲枯有客棹艤遊南都南都煌煌在天上
虎踞龍蟠屹相向城中美酒斗十千臨行請君沽百錢
鳳凰臺頭弄明月拍手醉唱名都篇

渡奔牛閘

下河水低上河漫春雷吼閘奔流悍鼓聲夔夔催發船
百丈牽連若魚貫船頭水湧沉且浮順風張帆那可留
行人來往日南北惟有水聲千古流

過呂城壩

河水湯湯向東注壘土橫河障波住往來舟楫恒苦停
首尾相銜纔得渡車聲鱗鱗縵痕急船頭向天如欲立
龍門一躍直下來灘聲雷吼鮫人泣

題可菴老人寫竹

國初寫竹王舍人筆端生動妙入神風流太常繼其後
片紙一出人爭取可菴老人得此傳聲價在人尤赫然
江南賢豪動百數家家屏障生風煙前年寄我雪竹圖
天地慘淡雲糝糊大枝橫斜小枝亞金鞭擊折青珊瑚
今年寫竹吳江見寫出千人萬人羨鸞鳳盤空雲日翻
蛟龍出海風雷變鷗鵠無聲錦瑟稀湘娥披雲未遮面
老人老人勿自珍筆力轉多方絕倫高山流水志有在

金定尺八寸
莫謂識面無其人

雜言古

秋林會友圖

青山巖凝紫霞飛
泉如虹飲渥注楓林接葉紅
於花上有鸞鶴下麝麝玉樓珠箔
仙人家仙人顏色常美好
瑤池桃花得春蚤
門前石楠秋葉香滿地
綠雲風不掃
有客來遠方
驅車涉羊腸
車聲到門止
揖讓升高堂
高堂奕奕凌雲漢
瑤爵金盤青玉案
華燈煌煌照宴嬉
漢

女為生洛妃，旦浮雲不行。天欲低回風動地，飛花亂悲
歡。離合樂未央，起視明星夜。將半夜將半，舞且歌發激。
楚奏陽阿巧，笑兩頰生微渦。蛾眉曼睩光騰波，平生樂
事良蹉跎。對此轉覺哀情多，明朝忽驚雙鬢皤。其奈流
光如箭何。

許子厚約遊石湖，余以事沮，詩以謝之。

杭州檀西湖，烟花瀾漫天下無。石湖在吳苑佳麗亦足
雄，吾蘇青山龍嵒抱湖洙。吳臺越城兩荒址，紫薇舍人

天上歸乞得天書賣湖水湖水東西流世人相續遊古
人不可見令人來不休古人令人日更改湖上青山鎮
長在梵宇琳宮幾廢興湖波依舊東流海許君約客為
春遊繡被錦帆青翰舟攀巖踐穴肆探討滌洄擊汰相
夷猷山嵐湖淥可手掬大笑拂入杯中浮舉杯仰天作
鯨吸沃漑胃腎資冥搜時時得句輒嘔出錦囊錯落驪
珠投暮歸列炬照湖上水波湧沸魚龍洄蹇余汲汲塵
中走與約誰知此言負想像清歡寤寐間側身西望長

搔首作詩聊寓不平鳴有命重遊尚須後

題沈啟南西林唱和

故人訪我來長洲半道却入西林遊
西林蕭蕭倚絕壁仰見白日西南流
林僧晝眠開北牖驚呼謂是吾師友
遣人四出招良朋露坐中庭接杯酒
東方月出星滿天抗袞起舞心茫然
白璧無由報知己丹砂不復延流年
延流年真浪語何如飲美酒沉酣不知暑
曇花菲香充佛盧燭火流光駭仙鼠
既歌且謠其樂陶陶不有君子

那能逍遙詩成寫圖徐隱几頃刻雲烟生滿紙天機到處人莫知明日喧傳動城市

萬竹亭賦贈吳汝琇

我家竹林在平地土淺叢疎葉顚悴君家萬竹連高崗
儷美瀟湘與清渭崖光谷色相吐吞石澗潺湲潏復奔
鷓鴣啼秋白日暝蛟龍捲雨翻滄溟紅泥亭子開中央
朱闌碧甃周為防孔屏翠帳齊騰光秋蘭羅生瑤徑旁
光風泛轉菲菲香翠陰滿地凝不散綠水蕩漾雲茫茫

美人挾瑟調清商
朱絃高張分雁行
一彈再鼓發浩倡
清聲入雲哀怨長
鳳凰翱翔下寥廓
帝子不見山蒼蒼
我為萬竹歌歌長
唾壺缺平生不飲
令醉之醉後不禁
雙耳熱夜深起舞
月明中猛虎一聲
山石裂

暮春訪沈啟南道中作


姑蘇城中桃李花
風吹雨批成泥沙
離羣客子正無賴
對此不飲空咨嗟
美人別來應瘦生
思之忽泛婁江行
芳洲杜若何青青
林隔岸啼春鶯
春鶯嚶嚶求友聲

人之聽之無限情無限情在今夕疑義竒文賞還析大
勝山陰興盡回道路空留往來迹

重陽庵

道家謂王重陽修煉之所

我遊重陽庵不見重陽子丹成飄然與世辭騎龍遨遊
太清裏三山等鰲簪四海猶杯水萬里一瞬間千年片
時耳後人作屋青山頭重陽不來人自遊長風蕭蕭日
杲杲醉卧白石臨清流青衣洞深且幽銜花野鹿鳴呦
呦仰招浮雲喚白鶴吾將與爾仍丹邱



西村集卷二

欽定四庫全書

集部
西村集卷三

詳校官監察御史_臣曹坦

中書_臣劉源溥覆勘

覆校官中書_臣康儀鈞

校對官學正_臣常循

謄錄監生_臣朱清渠

欽定四庫全書

西村集卷三

明 史鑑 撰

五言律

送莫同知弟北歸赴試

省墓纔南下辭家又北征
淮山臨驛路易水遶都城
夜雨鵲原夢春風雁塔名
遙知曲江畔騎馬看花行

送吳鐵峯

春色濃如酒行行勸一杯
送君嗟此別執手問重來
野

鳥迎人語林花著雨開維舟未忍發日暮更徘徊

竹房

愛此竹房好偏宜方外情前村江動月清楚晝銷聲講
後雨花亂風來天籟鳴與師分半榻高卧盡餘生

送母舅朱漁隱

十年纔一見離合動悲傷投壁投河水驅車送渭陽青
山明夕照黃菊款秋光莫惜頻來過慈親髮已霜

哭何以高

少日才名重平生分誼親酒多應是病金盡未為貧往
事成春夢殘花逐市塵天涯空悵望零落轉傷神

斗室為澄道巖賦

斗室開幽處雲門俯水涯四方裁十笏一座演三車簷
短容明月窻低映襟花休言此中小世界亦恒沙

梅軒為李天瑞賦

愛此梅花好移來對草堂水邊微見影雪裏只聞香庾
嶺春如海西湖月似霜從教日吹笛無夢到含章

樂清

未老成歸計房開祇樹林青山塵外相明月定中心近
水行秋影焚香坐夜深世人尋不見惟聽海潮音

吳溪草堂

繼志能歸璧貽謀在肯堂重來山不改舊種樹加長燕
雀曉相賀芝蘭春更芳還聞放雞犬猶自認門牆

和呂別駕九日登姑蘇臺韻

偶遇登高節相為弔古遊砧聲吳苑暮雁影太湖秋得

句頻催和行杯更旅酬風流堪入畫妙手學營邱

一鶴為南京唐道士賦

愛爾仙家驥蒼松映縞衣一聲清夜唳片影上天飛赤
壁橫江過青城被箭歸飄然遊物外幾見世人非

泊虎山橋

曹太史名
亭曰擅勝

雨後水初漫日斜山更明地居吳下勝人似越中行掃
石看題字臨流試濯纓橋南一亭好新得翰林名

憇奉慈菴

松頭孤鶴下石罅亂泉鳴入鴈疑無路逢山屢問名客
行忘遠近僧老廢將迎一笑出門去五湖風浪生

送范世良

弱柳不堪折相攜話水邊離杯傳日暮歸路在春先凍
雪寒欺馬空江曉渡船永懷交際久況是昔人賢

菊莊

種菊久成莊門前水亦香花時常把酒日暮擬為糧正
色純無雜遐齡老未央何當事筐筥來此采餘芳

送王靜深還合州

風波纔定日舟楫又歸程月冷巴猿嘯人悲蜀道行陣
圖依舊壘山勢接孤城最是臨歧別秋高斷雁鳴

挽蕭以信

人道從軍樂誰知悞一生元戎歸旅櫬邊將失干城草
檄今無敵封侯竟不成空遺舊提劍淪落海西營

送康驛丞還廬陵

有金魚白
鷺二洲

握手獨相送君行我自歸風波千里遠烟樹一村微地

勝金魚近江清白鷺飛鵲原應在念回首依依

吳興道中有懷汝其通曹顒若

杳杳長途異悠悠逝水流江村孤宿夜風雪遠行舟寒
重偏欺客凌浮迥結愁故人應在念日暮尚登樓

夜宿奉先寺洪上人房

孤舟薄暮宿古寺奉先名地迥諸天近樓高片月明爐
香清作供漏水凍消聲愛此無生說流連過二更

題吳鐵峯家假山

仲子為山處容人得屢過峯巒平地起水木到門多欲
雨生雲霧經春長薜蘿流鶯如愜意百轉襟袵歌

飲烏步顧氏村居

去郭逾千步淳風自一鄉日斜魚市集歲久水祠荒草
色遙連浦花枝半出牆西南山更好欲渡苦無梁

喜張子靜見過詩以送之兼柬沈彥祥

擾擾百年內相逢能幾回折麻空有意抱病強登臺茗
水太湖接故人今雨來因風問東老何日共深杯

寄慈感寺一峯上人

其師圓如
規號蘭公

能詩蘭谷老化去已多年
雪上一峯秀燈前三昧傳
蓮花滴漏水月色照歸船
記得長松下曾參玉版禪

孤山

一上孤山望春波帶夕曛
西來千嶂合南下兩湖分
路遶前朝寺雲埋處士墳
畫船歸去晚歌吹月中聞

送靈隱書記淨無瑕遊京師

披衣新得戒杖錫又登程
世路隨緣去空門為法行
浮

雲上國遠片月故山明心地平如水風波自不驚

與汝其通觀錢塘江

渺渺春江迥無風亦有聲地平波動石海接氣浮城戰馬屯砂磧潮頭也世情臨流將喚渡南向越中行

將遊金陵夜泊震澤

朝飲平湖酒宵停震澤航從茲登遠道猶未出吾疆月隱星光爛花穠露氣香路人初不識笑問客何方

遊天申宮

張公
洞旁

問訊天申路期尋福地遊風林松子落石竇乳泉流溪
女行隨伴山花插滿頭道人能好客炬火不須求

遊報忠寺

善權
洞旁

選佛開名刹因山號善權地深青嶂合天近白雲連門
對長松樹池分小洞泉不知楹上篆雷震是何年

經下菰城

春申君
所築

靡懷函谷敗却事下菰營蕞爾非天險當時盛甲兵空
城烏鳥樂廢堞野雲平不獨吳宮裏離離蔓草生

漂陽道中

水盡行舟止途平抗策宜車聲來往道天氣雨晴時赤阪黃塵起青山碧草滋居人當路語留客飯松茨

經瀨水

即伍子胥
乞食之所

匍匐昭關下倉皇瀨水尋飯賢同漂母報德異淮陰一
死名無忝千金漫爾沉停車弔遺跡長嘆不成吟

魯廷瞻葉廷縉徐憲之送至龍江而別夜坐有

懷

晚泊龍江上君歸我未行乘流喜風順看月待潮生水
市浮舟賣漁燈入夜明鄉心與離思擾擾夢難成

華容十詠為毛同府賦

渺渺江南夢英英雲上生緒風吹不散懸火照還明涼
沁皋蘭被晴連湖水平時飛傍親舍遊子若為情

夢澤
晴雲

全楚疲興築諸侯賀落成侈心滋未足大屈好非誠往

事不可問野花空復情秋禽委毛羽猶似斷王旌

章臺
古跡

利涉在崇朝沱溪一水遙誰能須我友多是就人招乘

月影零亂傍舩波動搖晨雞猶喔喔客路正迢迢

沱溪曉渡

山峯儘奇絕雪景更精神玉筍抽當震瑤簪出莫寅高

低同一色草木借三春欲訪仙廬跡漫漫認未真

東山雪霽

湖水流無際山形蕩欲漂雲生齊北斗脉衍自南條朱

鳳高飛盡蒼梧別望遙禹功垂萬古祠宇亦蕭蕭

山有禹廟

南山

遠翠

橫木為梁處舟車日夜過彩虹垂飲渚靈鷲下填河雪

水西從蜀湖流北受沱吞崖溷牛馬鳴瀨失蛟鼉

板橋春漲

斜日章臺下杏花猶自紅古今皆過客開落盡春風楚

芊腰支細息嬌言笑通那能久客冶相映酒帘中

杏村夕照

水月原同氣高卑特異形運行常不息流動亦無停象

緯昭天闕容光小洞庭浮槎失南北隱隱數峯青

青湖夜月

亭廢獨遺基靈蹤托雨師湖山元自勝風月故相宜龍

駕雲中度鸞笙嶺上吹世人空想像齋酒日來嬉

赤亭遺址

驛路長松樹風來作萬呬龍吟翻翠蓋鳳舞奏琅璈列

陳初嚴鼓連營乍監旄猶疑宋飛將水上戰方鏖

驛路松風

荻溪道中

搖搖理舟楫杳杳事徂征
溪姓猶緣荻村名半帶城
凍雲含雪意老樹挾風聲
霜月欺寒雁嘹嘹中夜鳴

遊三茅觀

山勢西來盡江流北望遙
神仙長在世日夜再聞潮
藥采新生术籬籬編舊種
椒不須句曲遠聊此永今朝

夜投殊勝寺真上人房

春風苦無賴野寺暫相依
靜夜名香遍空堂漏水微
語

卷三
投機自息坐久世疑非愛爾東林月流光照客衣

元日

弘治
六年

流年令六十壯志日蹉跎得此已為幸更來能幾何青
山遊未徧白髮在無多去去不須道逢春且嘯歌

立春日

北向梅開未東行月建寅有生皆自樂無處不宜春似
我客顏老逢茲氣象新百年令大半猶是未閒人

謁張子靜墓

弭掉鴻村道來尋處士墳淚痕沾宿草悲思接愁雲繫
樹嗟無劍名家幸有文東風吹野水流響不堪聞

碧巖

在弁山之陰

問路捫蘿上遙尋鐘磬聲雲流看棟濕樹挺識人行澗
水晴懸瀑松風巧韻箏山蒼與湖綠點染自天成

瀑布泉

在碧巖之右

愛此巖頭瀑分明白練垂被風吹不斷得雨灑尤奇流
出有來處散開無盡期廬山亮同此只欠謫仙詩

鴨綠漾

近接太湖水倒涵蒼弁峯地無高麗險色比漢江醲蕩
漾數十頃嵐霏三四重碧巖長在望日暮忽聞鐘

大雷小雷

雙螺浸湖水萬古鎮龍宮小大名形異東西奠位同嘗
聞出光怪於此驗凶豐欲往嘆無翼憑誰學御風

與沈啟南從徐亞卿何中丞相度水道

濟世未為術逢人聊用情海桑惟日變水土幾時平遠

雁和雲杳寒潮趣月生茫茫不相識沿路問鄉名

渡吳淞江

暫出靡行役隣封非異鄉偶因停泊處始定往來方海

迥月浮水夜寒天雨霜終宵成輾轉歸夢與途長

宿徐公浦

岸崩橋易圯水闊渡難招浦溆遙通海舟航半趁潮市

聲先旦集野樹未霜凋明月如相識依依伴寂寥

經上海縣

不到雲間久於今四十春山川仍舊物交友半陳人梵

井鰻光泯華亭鶴唳新扁舟有歸興斜日下通津

至松江府

和石田自壽詩韻

流年今四紀強半在城中畫好能名世文成擬送窮趨
庭懼令子勿藥喜而翁昨夜燈前飲清吟對阿同

登吳山絕頂

古廟經年久荒臺落葉深江湖分向背城市遶山林盡
道迎秋榜誰同坐夕陰樵歌歸滿路驚散暮栖禽

哭林侍御五首

并序

侍御莆田人也成化間皇儲未定用事之臣有謀
為殷道親親之說以市權者人以事為未著而不

敢言公獨謂著則事成不可止矣乃先劾時宰以
折之雖以忤旨受杖然其事竟議格不行矣宰啣
之公謝病免宰去再起巡按浙之東西不以形迹
自拘好賢下士詢訪不倦且不避權要吏民愛之
亡何移疾代者未至乃上詔勅納印符絕乘傳而
歸歸三年卒哀哉初公之歸也某別於平望公屢
誦李商隱他生未卜此生休之句悽然泣下者久
之嗚呼公歿矣仰公高風偉公奇節感公知遇詩

以哭之

遠聞林侍御一夢掩泉宮
隴樹猶森栢山靈已避驄
禍消未萌際勇退急流中
無限憂時淚因君泣未窮

雲掩前星位人心去就間
惟公上封事深斥柄臣奸
灞上空留說梁王竟出關
大功安社稷瞻望孰能班

解綬歸田日相呼在驛樓
共嗟臨水別真作此生倖
忽得莆中問今為地下遊
空揮兩行淚寄與海波流

酸風射眸子南望淚盈襟
曾枉下車揖敢同行路心
隻

鷄千里弔匹馬萬山深此意未能遂淒涼轉不禁
繩愆共所職下士出常情茶譜羞充貢醫方欲衛生人
間不久住世外若為行想溘埃風起乘雲掩上征

題旌功廟

并引

少保于公廟在西湖墓上成化二年復公官爵遣
人諭祭巡按劉魁立祠於故第曰憐忠今上賜謚
賜廟額曰旌功有司歲祀

萬馬環行幄平沙走控弦萬方三日臨九鼎一絲懸不

有維藩議將為舉國遷救時平禍亂功業冠羣賢
李綱纔仗鉞謝傅尚圍碁廟議如美沸都城累卵危維
公際艱步異世若同時指授諸戎帥從容盡合宜
二聖弘興繼綸音賁貺同易名維一惠賜廟錄元功精
爽風雲接恩光雨露濃公神如不死感荷九原中

過橫塘

西向橫塘過風涼天又晴兩山沿路轉一舸問津行野
水飛雲度斜陽去鳥明采蓮人不見遙聽唱歌聲

久客無礙方丈贈覺源講師

碧殿明秋水香臺下夕陰堂空蓮漏迥徑轉竹房深習
靜疑忘世含虛已定心何時謝塵鞅來此事幽尋

中秋聞諸弟宴集湖上有懷

樂事愁邊減流年客裏過桂香秋色好天迥月明多欲
共嫦娥語其如良夜何遙知湖上飲達曙尚酣歌

蕉窻

愛此禪房好芭蕉綠滿庭雪中疑入畫定起自翻經曉

色和雲動秋聲襍雨聽心源有甘露一滴可通靈

冬夜逢臨川聶雲章話舊

頻年違晤語此日賁林垌
鬢髮緣愁白家山入夢青
功名成潦倒書劍尚飄零
明發松陵道離歌惜共聽

登多景樓

客裏一登臨長歌愜壯心
江山自今古人物幾消沉
潮落淮南近天垂海外深
改之詩尚在讀罷欲沾襟

遊甘露寺

清晨遊古寺雲氣晝昏昏列嶂環京口長江赴海門平
臨當北斗特立見中原無限興亡事傷心不忍論

與沈繼南登虎邱天開圖畫閣奉柬其兄啟南
投閒倚高閣林莽半斜曛山勢東南盡河流遠近分鳴
泉亂秋雨落葉下寒雲欲賦不能道空慚對卯君

送趙孟昂歸吳興

不到雲中久登高空自嗟好山多近郭有客喜還家一
帶白鷗水幾枝寒食花故人如見問愁鬢已霜華

登江淮勝槩樓

遠水際長天逢春更可憐
鐘鳴裏山寺人喚渡江船
漁鴈夕陽裏酒家疎雨邊
因悲客程事俯仰欲潛然

瓜步阻雨

客裏遠經遊那堪有滯留
雲山幾千里風雨一孤舟
樹影連江動潮聲撼地浮
故園歸未得南望使人愁

至通州

孤城控一區形勢扼東隅
海水分鹹淡民風襍楚吳
蜃

樓凝復散沙島漲還無問道尋魚客中宵望斗樞

其二

絕域經遊少重關啟閉嚴官租兼菽粟民業盡魚鹽海
氣朝成市潮聲夜入簾狼山渺何許空翠遠浮尖

天目山

宕蕘古道前一上思茫然廢井存遺跡殘碑記往年巖
陰交草色林薄起炊烟南望鄉關遠浮雲何處邊
和徐天泉劉完菴同過沈石田友竹居韻

去湖三里近種竹萬竿餘徑轉通幽處朋來問索居散
金時買畫補屋為藏書千古王摩詰輞川應不如

過沈繼南墓

寂寞空山下淒涼野水濱易名嗟有日掛劍愧無人月
冥猿啼夜天寒草未春素車來較晚灑淚忽盈巾

謁徐武功墓

絮酒來何暮淒涼百感生文名推獨步相業沮垂成才
大人多忌功高謗易行只應墳下水流恨去難平

七言律

分題得太湖送鄔用明還鄞

一水遙遙與海通，舟行疑似入虛空。
三江共接朝宗勢，萬古長懷底定功。
茂苑人烟帆影外，洞庭山色浪花中。
登瀛有客頻來往，欲駕雲濤趁便風。

贈金本清中翰

少將詞賦繼班揚，館閣周爰歲月長。
朝罷獨書天上詔，使歸那有橐中裝。
齊棺古隸先秦出，岐鼓遺文後世光。

乞得鑑湖三十里四明原是賀公鄉

寄震澤道士沈長春

春風歸騎柳邊停一上仙臺思杳冥
茗水遠從天目下弁山長遶太湖青
片雲孤鶴吹笙度千樹啼鶯把酒聽
最愛籠鵝能好客無人援筆寫黃庭

翫月和教諭陳啟東韻

閩嶺岩堯路幾層孤舟載雪興難乘
中秋月好應同見近海樓高不共登
千里信音回旅雁半生心事對寒燈

悲歌莫倚能彈鋏衣馬輕肥讓五陵

吳廷暉令子領舉予往賀以詩見贈次韻答之
渺渺韭溪居上流相思無奈駐行舟天香和月浮丹桂
秋水到門來白鷗教子今為採花使憂君欲起見京樓
留連故有新詩贈高誼難將雜珮醕

和吳益之留題接待寺之作

旅寓松陵厭市聲偶從蘭若暢幽情水邊行道來僧影
壁上籠紗護客名荷葉補衣秋色淨竹房清暑夜燈明

金少隱先生集卷三
廟堂雖與江湖接未許投閒老此生

送吳澤民歸梅堰

澤民家有芝秀堂

賓館窮經獨下帷吾家同叔每相資
青山折簡招歸隱白首逢人在別離
此日梅花應待雪新年芝草又生池
溪邊無數垂楊柳欲綰行舟住少時

留別胡有本

秦溪分手各天涯燈市相逢喜又嗟
遠地故交能幾會滿城春雪向誰家
川原近海潮多應光景催人日易斜

明發歸舟渺烟水思君雙鬢欲成華

西園八詠

為三原巡撫王公賦

牙籤縹帶滿堂垂未許沂公獨擅奇請俸寫來還自校
借人看去豈為痴晴窗露展虞生蠹淨几潛披矢下帷
培養真成濟時具又將餘力教家兒

藏書屋

試攜宮硯洗洄瀾漬墨淋漓最可觀龍尾蘸波玄玉淨
馬肝浮水紫雲寒風飄科斗文難定月射方諸濕未乾
頭白上卿臨帖罷又書封事獻金鑾

洗硯池

長松戶外鬱蒼蒼，卷幔蛟龍勢欲翔。
韓起曾經譽嘉樹，召公今又憇甘棠。
風生隱几聊聞籟，雨後呼童試采肪。
君子由來善居室，吾鄉亦有歲寒堂。

范文正公舊宅有歲寒堂堂下種松

松軒 蒼

內家叢裏許分移，富貴應為造化私。
承露玉杯和月冷，惜春羅幄護風吹。
紫臺姓魏猶循故，紅萼名韉似較奇。

一自旬宣江漢後，花開多不在家時。

秦府賜紅紫白三色樓子牡丹圖

隴頭雲氣如車蓋，變化油然去復留。
起處四方沾潤澤，

乘時六合可浮游風吹度影迷親舍日映成文捧御樓

楚水秦山千萬里停車北望思悠悠

隴頭雲

亭亭如蓋挺孤標先世遺來匪一朝色借綠袍榮及第

枝嬌黃鳥愜遷喬長承雨露當霄漢迥出風烟帶驛橋

不似灞陵原上樹管人離別半無條

門前柳

渭水園林尺五天繡衣筆勢更翩翩能文況是同年好

叙事還期後世傳坐見華風生草木端知采色畫山川

長安紙價應增貴到處令人快覩先

繡衣記

當朝太史漢中郎曾誌先公百世藏指事特書彰直筆
為銘傳後發幽光從教雨日長淋炙莫遣風雷下取將
試檢平生信無媿穹碑不獨妙文章

太史
銘

和秦太守廷韶遊虎邱韻

虎邱寺裏相逢處柳韞花嬌路不分澤畔紉蘭為雜珮
壁間剞蘚讀遺文清吟羨得江山助老懶思將筆硯焚
晚漱餘酣泉上立萬家烟火隔松雲

登吳興慈感寺閣

亭亭高閣倚斜暉
廿載曾從此地歸
往事已隨春草換
重來似覺故人稀
孤城近水青山映
遠樹和雲去鳥微
欲繫扁舟嗟未得
蘼蕪新綠釣魚磯

曹顥若載酒過訪以詩贈別

一樽相對思依依
老大空悲始願違
華髮鏡中看漸短
故人天際信全稀
黃梅雨少河流澁
綠樹陰多日影微
欲把漁竿江海上
却愁風浪濕荷衣

與姚視卿遊鴛鴦湖

金匱山房詩集 卷三
鴛鴦湖上蕩舟過鐘鼓聲稀擁楫歌落日亭亭經遠樹
涼風嫋嫋動微波孤村近水聞雞犬小駟穿花見綺羅
暝入芙蓉弄秋色滿身香霧月明多

夜宿嘉興漏澤寺寧慶山房

訪舊天涯未即歸且來林下叩禪扉孤城暮雨沉更漏
二月餘寒勝客衣近市不眠人語雜隣僧齊出夜燈稀
中宵忽作還家夢無奈鐘聲下翠微

春陰

浮雲蔽日不舒光，那更東風故作狂。
宿雨未收添積水，餘陰猶在閤諸陽。
山林有約空勞望，桃李無言也自傷。
園柳鳴禽俱寂寞，只生春草滿池塘。

訪吳廷暉偶成

訪君還作看花行，宛宛溪流兩岸平。
久雨閉門芳草徧，亂禽栖樹暮烟生。
更籌夜送人皆醉，童子春深服已成。
明日新晴天氣好，相攜臨水濯塵纓。

遊勝果寺赴沈文伯之招

天地茫茫幾廢興中峯依舊有巖亭江流到海逢潮轉
山勢如城遶寺青仙洞隔花春寂寂野雲將雨樹冥冥
幽禽似惜韶光暮頻喚提壺笑客醒

遊南峯寺

支遁道場有放
鶴亭馬跡石

擾擾浮生髮已星南峯此日始來經真僧化後今無馬
野鶴飛歸尚有亭清梵消聲蓮漏永夕陽鳴磬石門扃
登車欲去猶延佇滿樹啼鶯正好聽

送智天然住嘉興東塔

山中晚學修禪定又出升堂了世因漢守故居今入寺

寺故朱
買臣宅

吳僧新住舊為隣

智先住白蓮
在東塔之東

池分二水心同

淨

寺有青
白二池

塔近諸天供獻頻我亦鴛鴦湖上客

予先世
嘉興人

欲來松下問前身

沈啟南與余約遊金陵而先余至又先余歸嘗

聞余談義興山水之勝故舍大江與丹陽而

不事竟取道於茲將審余之說也因詩以送

之

草綠鶯啼淮水流
柳花如雪暗行舟
來期自信成先後
為客那堪有去留
此地片時還獨住
他山佳處已曾遊
東歸若遇鄉人問
春盡乘潮下石頭

吳元玉招賞牡丹以無都扶圖呼為韻

洛陽花事久應無
勝賞今逢在舊都
春色祇緣人自惜
衰顏還藉酒相扶
時無永叔誰重譜
座有徐熙合寫圖
夜靜更持紅燭看
滿庭如畫鳥驚呼

遊靈谷寺

緩轡吟行紫禁中
襟花千樹映禪宮
山藏靈谷聲疑應
水出皇陵勢自東
池上泛杯脩故事
松間掃石坐清風
老僧延客無他語
只數前朝有誌公

登獅子山遊盧龍觀

高皇帝駐蹕指揮
六軍敗陳友諒

玉輦宸遊事已遙
尚遺臺觀在山椒
長江自古為天塹
王氣於今屬聖朝
四海又安兵久息
千年豪傑恨應消
徘徊忽動西遊興
欲借東風駕晚潮

登甘露寺多景樓

滿目山川又獨來白頭懷抱易興哀郡城宜此開江嶂
佛殿何緣化劫灰萬里中原勞悵望千年鳴鶴自飛回
東浮西泛無窮艦總被潮聲日夜催

沙溪夜泊東沈啟南

有約東遊久未齊孤舟終日住回溪行廚火斷從人乞
中夜潮生覺岸低風急海雲迷去雁雨深沙市悞鳴雞
明朝應得隨君後遮莫春泥污馬蹄

沈啟南訪汝其通不遇寫畫賦詩寄之率爾次

韻

虛室塵埃滿榻生故人來往惜空行
剡溪莫謂終無對震澤從令重得名
山寺水村和夢遠渚花汀葉趁江清
題詩寫畫遙相贈未必王郎有此情

夢草哀海鹽王輅

一枕遊仙夢復醒無端芳草最關情
生時不惜春風力見處偏驚夜雨聲
原野綠齊疑蝶化華胥調引亂蛙鳴
西堂睡起成陳迹佳句長留萬古名

哭武功伯徐公

星實中庭夜已分始知天欲喪斯文導河猶有隨山迹
鑄鼎誰銘取日勲四海故人空許劍萬家歸馬舊從軍
東吳不是西州路也學羊曇哭暮雲

聚遠樓

新起高樓九溪上無邊風景在虛櫺太湖一水際天綠
洞庭兩山終日青帆帶夕陽來冉冉雁拖秋影入冥冥
何人卷幔吹簫坐明月滿空涼露零

于府尹景瞻張太守靖之劉邦彥沈明德寶峯

宴集

瀕湖樓閣少風塵勝日登臨屬縉紳
北道且依山作主南飛又見雁來賓
霜微嶺樹紅猶淺水落江籬綠未勻
老我已忘歌舞樂只將談笑款杯巡

謝沈彥祥茶魚之貺二首

新采雷鳴寄草堂未開先作滿林香
囊裁白絹封三印芽茁黃金露一槍
鬪處連塲誇得雋烹時比屋散分嘗

睡魔渴病俱消却欲報慙無織女章

釣得魴魚碧浪中遠煩分惠到吳東
漢江縮項本同調
松水細鱗斯下風鰭鬣亂欺林
筍綠腹腴微帶法糟紅
珍藏不敢成私享留待先祠薦麥同

問劉邦彥疾

遙聞末疾漸加瘳時向湖山續舊遊
杯酒尚須行樂用
花枝多為養生休春風楊柳迷歸騎
秋水芙蓉隱釣舟
何日從君柁樓底卧聽橫笛起中流

遊黃山鵑

湖州長興縣
呂山山中

行行東去欲何依為愛禪房入翠微
山在不知陵谷變鶴歸應見世人非
烟中草樹含春色嶺外雲霞斂夕霏
自笑遠人眉目異野禽驚起遡風飛

留別吳興諸君子

楊柳風和溪水平掉頭歸去趁春耕
青山滿眼渾相識白鳥隨人似送行
遠地幾時重握手孤城今夜獨聞更
離心好是秋霜劍無數塵埃拂又生

戊子歲秋夜泊松陵與沈啟南慶雲飲別

城陰分手即天涯
嶺樹江雲別路賒
未到故園猶是客
忽聞鄉語似還家
燈前今夜愁無寐
鏡裏明朝髮有華
欲問歸舟何處宿
月明和雁在蘆花

送吳禹疇之廣東憲副任

持節遙遙五嶺行
瘴烟蠻雨避前旌
已知吏戢無漁獵
莫倚時平弛甲兵
詩句擬從官長學
船舶船多候海風
生
隱之自是君家事
不為貪泉易此情

送鄒師孔遊維揚

憐君失意向天涯
雨歇虹亭日已斜
對酒不須嗟往事
渡江知是客誰家
孤城猶繫揚州郡
四海空傳后主花
莫過雷塘弔陳迹
只今殘柳尚啼鴉

喜舍弟鐸病起得子

卧病經旬為爾憂
今朝最喜是全瘳
子雖生晚終延後
菊縱開遲尚係秋
杯酒諒隨詩共廢
田禾無奈雨來收
故交賴有宗人在

宗人指正夫也

時肯相過盡日留

送汪世望還吳興

頻年踪跡遍天涯書劍蕭條興味賒
楓冷吳江人執手月明苕水客還家
霜前黃菊驚寒早湖上青山易日斜
落魄布衣今白首也將詩酒度年華

送韓縈丞河內

領得除書下九重翩翩花縣去哦松
吏人呈案無鉗紙星駕行春屢勸農
河內水流城外過太行山色雨餘濃
寇恂去後今陳迹千古遺民說再逢

鶴舟

為陳良佐賦

幽人養鶴愛風標行動常令載近橈
丹頂映波春泛雨縞衣籠月夜乘潮
幾聲篷底清宜聽片雪船頭白未消
我欲從君渡江水扣舷歌罷又吹簫

次進士馬中錫吳淑遊京師西山韻八首

同年期集鳳城西盡日吟遊信馬蹄
河水合流滄海接山陁回繞白雲齊

連山中斷曰陁太行山第八陁在幽州

離離遠樹行人

杳渺渺平沙去鳥低共幸成名今刻石
不須重向塔前

題

繡幃朱輪駕曉風
青山行盡見離宮
水通河漢浮天碧
雲護蓬萊映日紅
千里關城臨絕塞
萬家園圃灌連筒
登高作賦忘歸去
薄暮纔云馬首東

訪水尋山幾日程
清明時節喜新晴
太行天限幽并域
靈物人呼大小青
花雨霑香迷蝶夢
松風鳴籟和泉聲
九重垂拱巡遊少
已廢前朝避暑亭

西山遙望日氤氲
矯矯東馳萬馬羣
固國已知天設險

為霖還賴石生雲根盤鉅野河流繞勢接諸陵王氣殷
聞道朋遊多樂事春風吹酒不成醺

渺渺西湖映綠袍相攜臨水試連鰲已教潁上居風下
未許杭州索價高波接玉河通御氣雲流銀浦見秋毫
芙蓉萬頃皆蒙澤不信東風在杏桃

瓊林宴罷出瑤京勝水佳山處處行鄉使南歸金帖寄
日華東上慶雲橫人間富貴春三月天上中和樂九成
自笑無媒林下客白頭猶未濟文明

北望居庸萬仞關重重深鎖白雲間金湯塞險都城壯
亭障乘邊苑馬閑田畯勸農春麥野虞人校獵曉置山
郊行祇擬觀形勝不為韶華久未還

天風吹送上雲梯羅襪生塵草被隄黃榜題名雙闕下
青山迎馬九門西花明禁苑春初媚柳拂宮袍綠未齊
幾度醉歸更漏永銀河斜轉玉繩低

送曲主簿運糧之京

曲登州人將便道
還鄉其性好獵

贊公新董歲漕行舸艦乘風五兩輕瓜步寒潮中夜落

潞河春水及時生禁門聽漏朝天闕歸路還鄉入海城
此地從來好畋獵臂鷹驅馬少年情

挽黃夢熊

湖山嘉遯謝塵纓纔入中年命忽傾舊宅一區猶令子
遺文千首付諸生詩名到處人爭誦墓上逢春草又萌
後死從來未相識聞風也自不勝情

送張世鴻還杭州

酒盡歌停夜靜時醉看明月上花枝神交已恨相逢晚

老至方知送別悲
野店聞雞舟發早
海天零雨雁來遲
吳山翠滴西湖水
水遠山長不盡思

送計正言

元夜燒燈送酒頻
共憐明發有行人
情知白首偏傷別
莫信青袍已誤身
歸棹遡流溪路狹
東風和雨柳條新
從今一去相逢少
夢裏尋君恐未真

和沈啟南登鳳凰臺韻

并引

嗟予以後至金陵
不獲從啟南先生
登斯臺也但

能於詩畫之間想慕勝遊戀戀而已因賦以續貂
春草萋萋被路生荒臺空有鳳凰名三山二水固長在
四海一家將再鳴津樹故迷桃葉渡江流今避石頭城
謫仙賦後君斯和落日浮雲無限情

送徐憲之選貢入京

朔風吹雪水流澌歲晏逢人別更悲吳會民饑猶病稅
洛陽年少正憂時徂征漸覺川途異草對應忘刻漏遲
自笑臨岐空執手贈君無地覓松枝

次沈履德集古詩韻

休文孫子錢塘住日日笙歌湖上聞
花映酒盃邀夜月山行衣袂濕春雲
逢人傾蓋能如故集古詩成自不羣
知我無聊遠相慰一篇直欲掃千軍

贈張太守靖之

龍去孤臣泣抱弓平生心事有誰同
青春甚惜居閑地白首相逢在客中
雲氣冥冥山寺晚花時冉冉野亭空
殘衣留取休沽酒歲暮還堪禦北風

遊天界寺

有僧道成者高皇帝命住茲寺辭以不能參禪上乃頒旨不許參禪

聯騎春遊入化城
松風澗水自泠泠
山門迎日諸方仰
劫火何年此地經
故事放參僧不語
遺基猶在草長青
西菴看竹流連久
歸路冥冥暮雨零

春夜仝汝其通曹顥若吳永年宴魯廷貴別館
病起逢人笑口開
春江花月共追陪
離家未遠難云客
會面無多暫接盃
浮雲富貴今何在
樂事平生得幾回
正爾厭厭賞清夜
鐘聲又自水南來

哭沈繼南

去年曾約看山行誰道重來隔死生
身後未成妻子計水流難盡父兄情
交遊屈指嗟無幾修短令人怨不平
下馬哭君斜日裏西風斷雁共悲鳴

哭完菴劉僉憲

嗟君一夢入槐宮回首平生事已空
闕下論刑親上殿河東行部舊乘驄
湖山曾有遲來嘆朝野猶聞勇退風
年少自憐交最晚幾番揮淚夕陽中

送俞大尹欽取御史之京

徵賢詔下五雲深，鸞鳳齊飛入上林。
驄馬候朝趨闕下，繡衣聽漏立花陰。
登車素有澄清志，簪筆寧忘獻納心。
寄語行人且相避，漢廷桓典重於今。

其二

詔許推賢送上天，此行真不異登仙。
郡中豈獨聞三異，囊底何曾受一錢。
已解銅章辭外補，定持霜簡拜新遷。
長洲苑裏甘棠樹，留與吳民說往年。

許克大分教桐城道過余家留詩見東賦以謝
之

翰墨論交歲月賒朱顏今已髧成華
兩回經見曾因客
三度相過不在家芳草伴人吟道上
亂雲隨鶴渺天涯
歸來讀罷留題句搔首無言對落花

秦淮夜泊

滿地月明淮水流帝城南畔大航頭
鑿山曾費前人力
逐利令宜過客舟六朝舊事消磨盡
四海安生割據休

玉樹哀音已亡國更無人在隔江謳

與金仲和飲別和沈啟南韻

尋醫兼作送春行又遇離人問去程
深夜欲眠還起坐老年為別最關情
楚雲將暝吳鄉杳蜀雪初消漢水生
北望中原應不遠可能從此駐行旌

西郭

幽居西郭且婆娑古屋年深老薜蘿
門對寒塘秋色早城平斜日晚陰多
施林置兔時丁祭教子明經世甲科

除目一來須強起野花啼鳥奈君何

聞汝行敏之京不及往餞賦此以送

時寓杭州

偶接家書喜復驚故人令作上都行吳山淞水非吾土
薊樹燕雲費客程投老每傷千里別向風難致一杯情
銓衡令是王司馬應念頭顱白漸生

寄劉有隆

窮居久與故人違始覺平生事盡非兩地風波驚乍息
十年鴻雁惜分飛花穠野寺山行遠草綠閑門巷出稀

令子能來慰愁寂，可堪臨水送將歸。

送凌漢章赴秦王之招

王號賓竹道人

老大辭家西入秦，灞陵原上柳條新。
盤和自得生斯地，扁鵲於今見後身。
設醴且陪花作友，曳裾還伴竹為賓。
一鞭已被君先著，悵望咸陽渭水春。

題扇寄閻尚溫

鴻雁秋來春復回，音書兩地各徘徊。
夢中不道關山遠，鏡裏空嗟歲月催。
吳苑朋遊非舊雨，秦川車轂轉輕雷。

相逢驛使無相贈聊托清風當隴梅

登長安龍祠道院閣

函香來禮玉宸君試上仙臺日已曛
灞上地名重此出浙西河水又平分
天垂蟬螭光流渚風振琳琅響入雲
黃葉滿亭秋色淨洞猿林鶴自成羣

凌天羽要遊臨平湖之讀書堆呈在席諸君子
無量聲光已陸沉書堆猶得住湖心
山嘶落日天將暝人鑑寒潭水尚深
開塞舊聞闕治亂羈遊今幸與登臨

明年擬起桃花入只恐仙源未易尋

又和徐肅夫原韻

蜩鳩何用羨鵬飛自分林泉老布韋青鳥不傳王母信
白鷗能識海翁機荷鋤隴上躬耕出倚杖門前數畜歸
衣食苟充吾願足浩歌乘月掩荆扉

送稽揮使還長安

落花時節子規啼中散還鄉馬首西漢苑別來為日久
秦川行到覺天低雲程遠見三春雁闕法令無半夜雞

不獨銷魂灞橋上
闔閭城外亦淒淒

其二

行行西邁古函關
到處鶯聲似故山
當代名藩推陝石
令王大雅繼河間
香凝命服趨朝罷
樂奏軒縣勞使還
戚里由來居肺腑
咨詢長得侍宮班

送楊宗周歸維揚

江亭酒盡客登舟
落木紛紛下未休
南路風波偏覺險
北方裘馬正宜秋
天垂迥野山橫接
潮入平川海倒流

二十四橋行樂處月明歌吹在層樓

都玄敬見訪夜話

蹉然步履忽聞聲喜極翻成倒屣迎
一別五年如轉眼重來信宿見交情
溪雲杳杳隨流去池月娟娟入牖明
夜半孤燈挑欲盡更傳餘爝在新荆

步出閭門書事

街巷泥融屐齒侵臘藏春色未堪尋
路逢故舊顏多改城受冰霜剝漸深
世自隨時成變易天應無意在晴陰

歸來獨坐蓬窗底笑引春醪度越吟

哭崔淵甫

績學攻文豈致災花時無奈雨相催天公似欲讐斯道
山木由來壽不材千里霜蹄中路蹶九霄雲翼下風催
忘年誼重今何望淚灑青山日幾回

贈頤浩寺辨如海上人

行徧江湖老始歸故山猶有佛相依裝輕惟貯吾徒贈
緣淺難留刺史衣貝葉編成看獨久曇花拈出笑曾微

相尋欲了神交念非是來叅不二機

從徐侍郎相度水道過吳興寄沈彥祥吳汝琇
碧苕溪上暫維舟行役匆匆不自由使者擬平洪水患
聖王時軫下民憂非才敢任求賢責傳食難忘急事羞
目斷滄洲烟樹外故人能不為時謀

還家有作

杖策相從使者行欲除民瘼豈求名言微難解旁人惑
才弱空期泮水平公論有時還自定浮雲於世本無營

西風吹動歸歟興笑對滄浪咏濯纓

遊報恩寺

祇樹陰陰輦路通禪林遙在百花中
龍宮湧出疑天造人力裝成象鬼工
仙梵入雲聞下界寶光浮日現虛空
長廊畫壁看難遍忽聽鳴鐘憶遠公

送諸立夫還杭

時聞西鄙有兵

月斜霜冷夜烏鳴匹馬蕭蕭候曉行
黃葉關河今日淚青燈風雨故人情
山連海岸孤城近潮入錢塘古渡平

聞道秦川新有警可能談笑去休兵

送表兄凌太常省親還京

綵服寧親暫乞歸思君行復上王畿孤雲回首頻南望
旅雁逢春又北飛水驛月明人語靜禁門風細漏聲稀
宮中入覲天顏喜日日含香侍瑣闥

寄陝西干布政

襄陽出守遂休兵

曾任襄陽知府時
流民作亂討平之

藩屏攜家陝右行

化雨又生秦地草遺民猶住漢時城函關西據河山險

渭水東流日夜聲聞道王師新定亂

時王師西征
干在行間

論功

應在一書生

送沈上舍省墓復還靖州

沈吳江人
今成靖州

巴陵南面古沅湘背嶺孤城閉夕陽地接五溪蠻洞襟
水通三峽楚雲長去時車馬經來路到日兒童問故鄉

聞道元方新出戰

時其兄以戰功陞
千戶出征廣西

功成相與沐恩光

送中竺佑禪師還杭州

片雲孤鶴共閑身杖錫南歸遠問津山水別來頻入夢

江湖行盡不逢人
中峯古寺松枝轉
東院禪房草色新
試看西湖舊梅樹
花開何似故園春

送傅上人住杭州保叔

瓶錫隨緣去入杭
湖山今已屬支郎
前朝古寺多南渡
下界空華出上方
滿地白雲朝入定
孤峯片月夜焚香
明年不負登臨約
應叩禪扉借竹房

弔內閣陳某

何事先生早蓋棺
薤歌聲裏路人嘆
填門客散恩何在

負郭田多死亦安鹽海已無前日利冰山誰障舊時寒
九原若見南陽李為道羅生已復官

之通州與吳永年飲別於垂虹亭

王事馳驅賦遠遊野亭杯酒為君留湖山有約憐同社
楊柳多情拂去舟花下歌聲催越女斗間精氣解吳鉤
明朝兩地相思處江北江南各倚樓

晚次吳門

扁舟晚泊古城陰野店吳歌攪客心蝴蝶夢中春草遠

杜鵑聲裏落花深
漁燈隱隱明沙岸
江雨霏霏濕布衾
一曲瑤琴許誰聽
江湖隨處有知音

泊楓橋

千古楓橋尚有名
孤舟來泊最關情
江村漁火愁仍對
山寺疎鐘夜不鳴
兩岸帆檣春水上
萬年樓閣月華明
夢回試向蓬窗聽
無復烏啼繞樹聲

錫山道中聞子規

行行西上竟何依
一片春帆帶落暉
歸夢獨隨流水遠

客程惟覺故人稀
飛花小圃鶻聲急
芳草平原樹影微
惆悵鄉關渺何許
東風回首欲沾衣

至京口

北上南徐艤畫橈
欲將興廢問前朝
依山城郭高低堞
近水人家早晚潮
風到海門鷗社散
草青江路雉媒嬌
夢溪風物今何在
故壘離離細柳凋

遊鶴林寺

潤州城外古招提
杖策來尋日向低
林廢不堪黃鶴怨

花空惟聽杜鵑啼香臺草長迷行迹竹院苔深漫石題
坐對青山無一語出門蹊路失東西

渡江

解纜朝離鐵甕城倚篷偏使客心驚雲連極浦千山繞
風轉危檣五兩輕淮甸日斜春草綠海門潮落大江橫
興亡盡付東流水日夜滔滔似不平

郭璞墓

一石巉巖似琢成何年此地卜佳城銜刀自信難逃禍

撒豆徒聞可化兵
雨過隧前無草色
月明江上有潮聲
鵲巢雙樹南崗路
千古傳死後名

廣陵懷古

滅項誅秦始剖符
江東千里盡封吳
鑄銅為鏹山仍在
煮水成鹽海未枯
几杖未能慙賜賚
干戈何事起謀圖
到頭兵敗身隨殞
贏得功名屬亞夫

其二

黷武窮兵未肯休
都將霸業葬揚州
迷樓珠翠雲間出

內苑笙歌月下遊
眉掃遠山螺黛盡
風生流水妓航浮
江淮欲據仍無策
引鏡堪羞嘆斫頭

其三

龍舟行樂到蕪城
極侈何愁四海兵
神器共傳歸李子
樂章先識去宮聲
鳳池有水鷗常下
螢苑無人草自生
寂寞西園明月夜
只令惟有草蟲鳴

其四

何遜能詩最有聲
思梅還復到蕪城
風臺徙倚看花繞

月觀徬徨對影橫粉蝶已無春曉夢翠禽時聽夜深鳴
客愁此日釀如酒安得寒香為解醒

其五

北風吹霧晝昏昏獨守孤城節義存一劍身持惟有死
四郊兵合竟無援烟生睥睨焚降詔血濺旌旗灑淚痕
落日重遊弔陳迹買絲空欲繡平原

其六

淮海名花世所尊當年培植徧諸園玉盤盂小春光淺

金帶圍偏曉露繁卿相昔聞千古賞子孫今見幾家存
東風掃地城南路蔓草寒烟欲斷魂

其七

淮海維揚鎮楚郊江山環抱勢宕蕩月明十里珠簾捲
風度千門翠幙飄羽客腰纏思駕鶴玉人攜手教吹簫
於今風景多蕭索原草離離野火燒

其八

春風孤棹遠經過千古繁華逐逝波楚地江山今尚在

隋堤楊柳已無多
瑤花臺古遊仙往
芍藥廳荒牧豎歌
二十四橋明月夜
吹簫人去奈愁何

狼山

狼山一上思依依
烟景蒼茫入望微
江水東流千里去
海天南望幾人歸
雲迷遠樹啼鶯杳
麥秀平原獵騎稀
寄語沙鷗莫相避
客懷蕭索久忘機

劍山

水流花落送殘春
偶逐漁郎一問津
山頂著鞭猶有迹

海濱驅石已無人風來野戍邊聲起雨歇平原草色新
欲覓麻姑探消息弱流清淺幾揚塵

軍山

軍山東望遠依依芳草平蕪客去稀風急海鯨吹浪過
月明神女弄珠歸孤峯縹緲青天遠弱水茫洋白鳥微
欲賦壯遊無警句令人重憶謝元暉

龜田

經界分明出化工寶龜形狀儼相同荊州納錫充王貢

洛水呈祥助聖功千歲不巢蓮葉上一秋長入稻花中
野人共信神靈在豚酒時來卜歲豐

海

浩浩洋洋望欲迷風帆無路認東西一丸地據中央小
萬里天垂四面低元氣淋漓浮日月洪波洶湧起鯨鯢
堪嗟秦漢求仙者幾望蓬萊竟莫躋

西村集卷三